



FACTVM.

POUR M^{re} Nicolas le Page S^r de S^r Loup, Conseiller du Roy en ses Conseils, cy-deuant Tresorier general de l'extraordinaire des guerres, demandeur en reuision de Compte & Estat de fraix.

CONTRE les Sieurs Talon & Moreau ses Commis.

COMPTE DE CLERC A MAISTRE,
Portant debet de 15899. liures.



E dol personnel, & la conuiction des faux employs par nouuelles pieces qui sont du faict des Comptables, donnent tousiours ouuerture à la reuision de leurs Comptes, & mesme à Requête ciuile en toute sorte de matieres dans les Cours les plus reglées. *Si per dolum sciens falso aliquid allegauit, & hoc modo consecutum, eum sententia prætoris liquido fuerit approbatum, existimo iudicem debere querelam rei admittere, En la loy, si prætor & Marcellus ff. de iudicis, Et en la loy 2. ff. si quis cautionibus &c. Præstitit causam nullitatis sententiæ qui eam dolo meruit.*

Et dans la matiere de Compte mesme de Financiers pour leur reuision, la loy ne demande que le secours de nouuelles pieces, *quia officium eorum atque ministerium publicam habet causam & hæc principalis eorum opera est ut actus sui rationes diligenter conficiant l. 10. ff. de edendo.* C'est pourquoy, dit le mesme texte, *si apud hunc iudicem, qui inter eum & argentarium iudicat, potest probare se illo iudicio, quo victus est, vincere potuisse, poterit tunc probare; & si non probabit, aut probantem index non curabit, de seipso aut de iudice queri debet; Fieri enim potest ut nunc rationes vel ipso edente, vel alio modo nactus, aut aliis instrumentis quibus illo tempore aliqua ex causa rei non potuit, possit probare, potuisse se vincere, quia quod ante non potuimus, intercepta cautione probare, & ob id amisimus; hoc nunc aliis instrumentis quibus tunc rei non potuimus, probare possumus.*

Les deffendeurs ne doiuent point icy interesser l'auctorité du Conseil par l'execution de ses Arrests, C'est la premiere fois que cette reuision de Compte est demandée: Partant ce qui est à iuger n'a point encore esté iugé.

L'on sçait que le Conseil du Roy est le suprême Ciel de la Iustice, que sa Maiesté comme son soleil y est tousiours presente, quoy qu'elle ny soit pas tousiours visible, que les Arrests qui s'y rendent sont les oracles de sa bouche, & que ces paroles d'*Aurelius Arcadius* M^e des Requestes de l'Empire Romain au Consistoire Imperial où le Chancelier presidoit, peuuent estre applicquées aux Illustres organes dont elle se sert; *Credidit princeps eos qui ob singularem industriam explorata eorum fide & gravitate ad officii magnitudinem adhibentur non aliter esse iudicatuos pro sapientia & iure dignitatis sue quam ipse foret iudicatuus l. vnic. ff. de officio præfecti prætorio.*

Mais bien loing que la sublimité de cét auguste Consistoire leur doieue donner de la confiance, ny seruir de protection, que comme elle aggraue leur dol,

Elle les doit charger de confusion, puis qu'après leurs propres interrogatoires qui leur sont rapportez pour preuve conuainquante de leurs faux emplois, ils n'y peuuent plus paroistre que comme des gens qui ont imposé au Prince, trompé & circonuenu le Conseil par de fausses allegations, & par la manifestement surpris sa Religion & sa Iustice.

Ces faux emplois ne sont pas de petite consequence : car ils passent Cent mil liures rependus en quantité d'articles de la despence dudit Compte.

La premiere nature de ces faux emplois consiste en neuf articles d'interests d'emprunts que les Rendans ont supposé auoir faits à diuers temps, montans à 19132. liures; Ils ont rapporté pour les iustifier des certifications du General, ils ont rapporté l'Estat de leur maniement qu'ils auoient fait arrester par le sieur de Dorée Intendant de l'Armée le 28. Ianuier 1644. où ces mesmes interests estoient passez, Et c'est par ces pieces qu'ils ont estably leur imposture, & fait passer le faux pour le vray : Car il se trouue qu'il n'y a eun y emprunts faits, ny interests payez. En voicy la preuve.

Les Rendans furent arrestez prisonniers en l'année 1645. & leurs papiers saisis, Ils furent interrogez par Monsieur Fouquet à present Sur'Intendant des Finances, & par le Lieutenant Criminel de Paris, sur plusieurs articles de faits, & entre autres sur le fait de ces emprunts & payement d'interests, le sieur de Dorée fut pareillement interrogé : sçauoir, deux à la Bastille, & l'autre à Barcelonne, & par tous les trois interrogatoires qui se sont trouuez contextes, ils ont iuré & affirmé que lesdits emprunts n'auoient point esté faits, ny lesdits interests payez, Et que les emplois qui en auoient esté faits dans l'estat de la despence de l'Armée n'estoient pas veritables.

La seconde espece de faux emplois, consiste en plusieurs autres articles qui ne sçauoient estre precisement cottez que par le nouuel examen & reuision dudit compte, & regarde vn prest de cinquante deux mil liures aux Troupes faux, & supposé, & qui n'a iamais esté fait.

Or par ces mesmes interrogatoires les Rendans & ledit Sr de Dorée ont encore recogneu que ce prest de cinquante deux mil liures n'auoit point esté fait, & neantmoins qu'il estoit compris dans la despence dudit Estat.

La troisieme consiste en deux articles de chacun douze mil liures, dont ils ont encore enflé à faux la despense dudit compte.

Le premier causé pour la leuée & armement de deux Compagnies Allemandes, pour ioindre au Regiment de Balthazard, sous les noms de Remy Must & Henry Vveber. Le second pour la pretendue leuée de deux Compagnies Catalannes, sous les noms de Dom Gran Alamany & Hyeronime Thamarit.

Or les rendans & le sieur de Dorée auoient reconnu par ces mesmes interrogatoires, que ces leuées n'auoient point esté faites, & neantmoins contre leur serment & leur conscience, ils ont esté de si mauuaise foy que d'employer encore ces fausses despences dans le Compte dont il s'agist.

De fait, encore que tous les articles de l'Inuentaie de leur despence & acquits ayent esté apostillez à la marge, neantmoins il n'a esté mis aucun apostil a costé desdits deux articles, quoy que sur tous les autres, Moreau l'un des deffendeurs ayt écrit de sa main ce mot *Vray*. Et les *deficits* à ceux qui n'ont esté fournis.

Et quoy que par la certification qui est enfin dudit Inuentaie, ils ayent reconnu auoir paraphé tous les feüillets d'iceluy, neantmoins le 508. où ces deux parties sont employées, n'est point paraphé dudit Moreau.

Il doit encore auoir plusieurs autres faux emplois en la despence dudit Compte qui se reconnoistront en procedant à la reuision, pour laquelle il est necessaire de rapporter les acquits. Car le Conseil obseruera que le demandeur

quoy qu'en qualité de Tresorier, ~~les~~ deust auoir entre les mains, neantmoins il ne les à iamais veu ny peu voir par l'artifice des deffendeurs, qui les porterent directement au Conseil ou il les ont fait examiner, & de là remettre à la Chambre des Compres.

Ces faussetez sont iustificées par ces trois interrogatoires, ce sont pieces nouvelles que le Conseil n'a point encore veuës, elles sont du fait des deffendeurs; il a falu les tirer avec bien de la peine du Greffe du Parlement de Grenoble, la bonne foy deuoit épargner cette peine, & c'est par vn dol euident des deffendeurs, que la verité n'a pas esté conuë au Conseil, lors qu'il a iugé ce Compte.

Or la recepte & despence d'un Compte sont d'une mesme regularité, il ne doit rien entrer dans la recepte qui n'ait esté actuellement receu, Il ne doit aussi rien entrer dans la despense qui n'ait esté effectiuement déboursé, Si les deffendeurs auoient esté chargez en recepte de quelques parties, & que depuis l'arresté d'un Compte, ils eussent la preuue que celuy qui les auoit obligez de s'en charger eust reconnu & affirmé en Iustice ne les auoir point déliurées, On leur demande quelle Iustice ils voudroient qu'on leur fit, & l'on ne leur en demande point d'autre.

Ils se pretendent demesler de ces faussetez conuaincuës par d'estranges euasions.

Premierement, Ils disent qu'il ne faut point auoir d'égard à leurs interrogatoires, leur raison qu'ils estoient prisonniers: mais l'on ne croit pas que personne ose aduancer dans le Conseil du Roy, que des confessions faites en Prison publique par vn interrogatoire presté deuant vn souuerain Magistrat apres serment ne soient d'aucune creance dans la Iustice, il faudroit inculper le Roy par les ordres duquel ils ont esté arrestez de leur auoir fait faire violence pour tirer d'eux ces reconnoissances; tout ce qui vient du Prince est sacré, son ordre fait valider des actes qui d'ailleurs passeroient pour nuls, comment pourroit operer vne nullité dans des actes d'ailleurs tres-valables.

Les deffendeurs ne disent point que ce qu'ils ont affirmé par ces interrogatoires ne soit pas veritables, pourquoy ne veulent-ils pas que l'on ait égard à la verité?

De fait ces Interrogatoires ont deux marques, qui les doiuent faire passer par tout pour la mesme verité.

L'une qu'il y en a trois des trois diuerses personnes en differens lieux à la Bastille & à Barcelonne, & neantmoins ils sont contextes, la verité seule à peu faire cette vnion.

L'autre que ce ne sont pas interrogatoires prestez sur simples faits: mais sur les propres papiers des deffendeurs, qui leur ont esté mis deuant les yeux.

Mais il y a deux autres arguments necessaires de la verité de ce qu'ils ont dit, qu'il n'auoit point esté fait d'emprunts, ny payé d'interest d'iceux.

L'un qu'il paroist pour leur Compte, mesme qu'au temps qu'ils ont marqué auoir fait lesdits emprunts & payements, ils auoient receu vn million tant de mil liures, & qu'ils n'auoient despensé que huit cens tant de mil liures: Tellement qu'ils auoient lors deux cens tant de mil liures du fond du Roy.

L'autre que tant s'en faut que la despence de l'année, dont il s'agit, ait excédé les fonds, qu'il s'est trouué encore 9200. l. de reste, que les deffendeurs ont remis au sieur le Clerc Tresorier, entré en exercice l'année subsequente.

Ils disent en second lieu, que quand le contenu en ces Interrogatoires passeroit pour veritable, Il n'en resulte autre chose, sinon qu'ils n'ont point fait les despences contestées pour les causes qu'ils ont dites: mais qu'ils ne laissent pas de les auoir faites par vn payement actuel de sept mil pistolles qu'ils ont données au General d'Armée.

On leur demande la preuve de leur fait, s'il estoit vray, ils auroient le recepiſſé du General, ils auroient raporté cette ſomme dans la deſpence de leur Compte : mais il n'y en a point eſté parlé, non plus que dans l'Eſtat arreſté par l'Intendant de Dorée en l'année 1644. Ils le diſent de parole ſans preuve, il s'agit de ſept mil piſtoles, il faut du papier pour de l'argent, de plus il n'y a point de parties dans la deſpence de leur Compte qui reuiennent à cette ſomme.

Le General a fait publier vn FACTVM que toute la France aueu, il y demeure d'accord que les deffendeurs luy fournirent ſept mil piſtolles le 1. Mars 1643. Mais il adjouſte qu'il les leur rendit le quinzième iour en ſuiuant, & pour preuve de cette reſtitution, il a raporté ſon recepiſſé de ladite ſomme, datté dudit iour premier Mars, & l'endoffement des deffendeurs du 15. du meſme mois, lequel recepiſſé & endoffement ont eſté tranſcrits dans ce FACTVM, & ſont au Greſſe du Parlement de Grenoble.

Mais voicy ou l'on peut dire, que *mentita eſt iniquitas ſibi*, ils diſent qu'ils ont ſimulé ces paiements d'intereſts pour remplir ce vuide de ſept mil Piſtoles qu'ils auoient donnez au General, & neantmoins les pretendus paiements d'intereſts ſont dattés en partie des mois de Février & Mars, & ils ne dattent le fourniſſement de ces 7000. Piſtolles, que du premier Avril enſuiuant, qui eſt vne manifeſte implication.

Il faut paſſer plus auant, ce ne ſeroit pas aſſez que des Commis euſſent déboursé l'argent pour le rapporter en deſpence au Treſorier, Il faudroit qu'ils l'eueſſent valablement déboursé, & qu'ils luy en apportaffent des acquits comptables en bonne forme. C'eſt la charge expreſſe de leur Commiſſion, autrement il n'y auroit Commis qui ne peut ruiner ſon Treſorier.

Or non ſeulement ils ne raportent aucuns acquits de ce paiement de ſept mil piſtolles, mais ils n'en parlent point du tout dans la deſpence de leur Compte : & ainſi il faut que la deſpence fauſſe & conuaincuë de fauſſeté ſoit rayée, & que pour la deſpenſe que ces Commis diſent veritable, le Treſorier demeure à deſcouuert, & ſans pieces pour la faire paſſer.

Pour leur troiſieſme deſſenſe, ils diſent que ſi le General à voulu ſimuler ces faux emprunts & payemens d'intereſts, ils ont eſté obligez de luy obeyr, & qu'en qualité de Commis telle obeyſſance les deſcharge, veu qu'ils raportent les Ordonnances & Certifications dudit Seigneur, fauſ le recours du Treſorier contre luy.

Vn General peut prendre de force des deniers entre les mains d'un Commis, Cela s'eſt fait quelque fois, le demandeur la eſprouuë en ſa perſonne faiſant la meſme fonction, mais il vint à la Cour en faire ſa plainte & prendre les ordres du Roy, en vertu deſquels il ſe fit rendre les deniers.

Les deffendeurs n'accuſent point la violence du General, mais leur propre volonté, & la iuſtifiant en vne forme qui fait leur conuiſtion : ſçauoir, par vne reſcription dudit iour premier Auril à Robert leur Soubs-Commis de payer les ſept mil piſtolles ſur icelle, ſans en tirer aucun eſcript : Quand des Commis baillent de l'argent de cette ſorte, ils en font leur propre faiſt.

Mais quand il a fallu faire & ſigner des promeſſes ſimulées, ce n'eſt pas le General qui les a ſignées pour eux; Ces Ordonnances d'emprunts qu'ils raportent, & les employs ſimulés qu'ils en ont faits dans l'Eſtat de la deſpence de l'Armée arreſté en 1644. & dans le Compte dont il s'agiſt, ſont leurs ouurages : Et de faiſt, Moreau a recogneu par le 52. atticle de ſon interrogatoire, que c'eſtoit Talon qui auoit fait leſdites Ordonnances de faux emprunts; perſonne ne pouuoit mieus ſçauoir qu'eux s'ils auoient receu des deniers d'emprunts, & s'ils en auoient payé des intereſts, ils ont fait, dit & eſcript ce qu'ils n'ont pas fait, & pretendent auoir fait ce dont ils n'ont rien eſcript.

Pour quatriemes deffence, ils disent que telle que soit cette despence, elle a esté passée au demandeur sur leur Estat & pieces iustificatiues dans le compte qu'il a rendu à la Chambre : partant qu'il est des'intressé.

Le demandeur a double responce à cette objection, qui ne deburoit pas estre proposée dans le Conseil du Roy.

L'une, Que le Conseil ny la Chambre ne souffriront iamais pour le Roy que l'on consume ses fonds en des despences feintes & simulées : Quand le demandeur ne se plaindroit point, il est de Iustice necessaire de les rayer à la veüe des preuues formelles de la fausseté. Et si la chose passoit iusqu'à la Chambre, il ne faut point doubter que sur la correction où le Compte est en estat d'estre mis, la Iustice ne soit faite au Roy, & dès à present le demandeur declare qu'il n'a pas moyen de l'empescher.

Or quand ce qui doit arriuer inéuitablement sera arriué, il est indubitable que le Tresorier comme responsable de ses Commis, demeurera chargé du debet que ces fausses despenses auroient causé, sauf son recours contre les mesmes Commis : Et quand ils auront l'argent qu'ils luy demandent pour debet de ce Compte, & qu'il sera obligé de les discuter, & cependant de payer, il seroit lors forcé dans son respect de se plaindre de la Iustice, si elle n'auoit pourueu à ses interets à present que ses Commis luy demandent quinze mil huit cens quatre-vingts dix-neuf liures pour debet d'un Compte, duquel ils deburont eux mesmes plus de cent mil liures.

Leur dernier moyen de dire que s'ils estoient redeuables, ce seroit au Roy, & non point au demandeur, n'est pas bon à proposer dans le Conseil, où le Roy est tousiours partie en ce qui regarde son interest, mais il ne vaut rien à l'esgard du demandeur, par ce qu'il s'acquitte enuers eux de ce debet, pour lequel depuis que la reuision est demandée, ils ont enuoyé cinquante hommes armez le prendre iusques dans son liét pour le traduire honteusement prisonnier, luy qui les a produits, & comme enfantés dans la fortune, & à qui ils ont toute l'obligation de leurs premiers emplois.

Il sçait bien que par ces radiations, il demeurera d'autant redeuable enuers le Roy, Mais c'est vne chose in'éuitable à quoy nulle puissance ne sçauroit parer sans iniustice, mais celuy la ne doit rien qui a bon recours : mais tant s'en faut qu'il reste debiteur des deffendeurs, qu'au contraire ils seront ses redeuables de grands deniers, mais il a d'autres mesures avec le Roy pour le maniement de sa Charge, Et en fin il a droit du Roy par bon & valable tiltre.

ESTAT DE FRAIS de 30000. liur.

IL est composé de près deux cens articles, tous ont esté debatus, & chaque debat à sa raison, Ils se montent ensemble à soixante seize mil liures, il y a Arrest qui a fixé le tout à trente mil liures, & osté par consequent quarante six mil liures aux deffendeurs de leur demande : Cependant ils veulent empescher vne reuision qui leur pourroit estre auantageuse, s'ils ont fait leur demande avec Iustice, & se conuainquent par leur reffus opiniastre de pouuoir aussi peu se soustenir sur ces trente mil liures qui leur ont esté donnez, que sur les quarante six mil liures qui leur ont esté ostez.

Or la reuision à trois fondemens.

Le premier, Que iamais il n'y a eu de pieces iustificatiues, ny communiquées, ny mesme produites de cét Estat de frais : Et ainsi l'Arrest à alloué pour trente mil liures d'articles, sans que la partie ny les Iuges en ayent veu de pieces iustificatiues : Car il n'a esté rapporté que pour trois mil tant de liures de quit-

tances par vne production nouvelle des deffendeurs ; Partant contrel'Ordonnance qui veult que les cahiers de frais des Commis se iugent sur les pieces iustificatiues.

Le second, Que l'Arrest n'a point iugé le procès, puis qu'il n'a point prononcé sur chaque article de debat, pour faire veoir ce qu'il a passé & rayé, mais à fait vn bloc qui ne se fit iamais en Iustice.

Or cela est icy d'une grande consequence, par ce que les deffendeurs pretendent auoir enseuely toute leur mauuaise foy dans ce bloc general, & rejetter tous les faux employs que le demandeur leur peut cotter sur les 46000. liures qui leur ont esté ostez.

Le 3^e, Que les mesmes Interrogatoires des deffendeurs de nouveau raportez, reduisent à neant par leurs propres recognoissances, presque tous les articles dudit Estat : Car ils ont reconnu par serment qu'il y auoit eu rendez-vous des Troupes à Cerueres pour receuoir les payemens (c'est par l'Interrogatoire de Moreau art. 75.) donc tous les articles de ports & voictures de deniers en diuers lieux doibuent estre rayez ; le mesme Moreau art. 137. a reconnu qu'ils payoient quelque fois deux où trois prests à la fois, Donc ils ne peuuent pas compter autant de differents ports & voictures qu'il y a eu de differents prests ; Il a encore reconnu que les Officiers venoient receuoir leur argent : donc inutilles les despences employées pour le leur porter : Et enfin il a reconnu qu'il auoit profité six mil liures sur les piastras, dont il n'a point tenu compte.

Partant la reuision est également de Iustice en l'un & l'autre chef.

Monsieur de Machault Rapporteur



THE HISTORY OF THE
CITY OF LONDON

IN TWO VOLUMES.
BY SAMUEL JOHNSON.

LONDON: Printed by J. DODD, in Pall-mall; and by J. HODGKINS, in St. Paul's Church-yard, 1774.

THE SECOND VOLUME.

IN TWO VOLUMES.

LONDON: Printed by J. DODD, in Pall-mall; and by J. HODGKINS, in St. Paul's Church-yard, 1774.

THE SECOND VOLUME.

LONDON: Printed by J. DODD, in Pall-mall; and by J. HODGKINS, in St. Paul's Church-yard, 1774.

